

Uunga siunnersuut:**Takornariartitsinermit, sumiiffinni nunami aalajangersimasuni zone-nut agguasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaat****Kapitali 1***Atorneqarfia aamma suussusilersuinermit nassuiaatit*

§ 1. Inatsisartut inatsisaat atuuffeqarpoq takornariartitsinermit ingerlatsinermit.

Imm. 2. Inatsisartullu inatsisaat ilanngullugu atortinneqarpoq angalaarnernut uninngaartarnernullu sumiiffinni immikkut toqqakkanut, kiisalu taakkunani inuussutissarsiornermit ingerlatsinermit.

Imm. 3. Inatsisartut inatsisaat atortinneqanngilaq takornariartitsinermit akuersissutit naapertorlugit ingerlatsinermit Sumiiffinni nunami aalajangersimasuni takornariartitsinermit akuersissuteqartarnissaq pillugu Inatsisartut inatsisaat naapertorlugu ingerlatsinerusartuni.

Imm. 4. Naalackersuisut ersarinnerusunik malittarisassiorsinnaapput inuussutissarsiutit sammivii immikkut aalajangersimasut inatsimmi matumani ilaatinneqanngitsut pillugit.

§ 2. Takornariartitsinermit ingerlatsinerit Inatsisartut inatsisaanni matumani paasineqassapput aningaasarsiornermit ingerlatsinerit ataatsimoortut aamma ingerlatsineq, siunertaqartut kiffartuussinermit neqerooruteqarnissamik, Kalaallit Nunaanni misigisassarsiornerit, pingaarnertut aningaasanik akiliuteqarlutik takornariartunut, aamma neqeroorutaasunut imaattutut:

- 1) Ulluinnarluni unnuinertaqanngitsunik angalaarnertut, aamma
- 2) Angalaarnerit ullunik arlaqartunik sivissusillit.

Imm. 2. Takornariartitsinermit ingerlatsinerit Inatsisartut inatsisaat manna naapertorlugu paasineqassapput inuk imaluunniit inatsisit naapertorlugit inuk, akuersissummik licens-imik tunineqarsimasoq Inatsisartut inatsisaat manna naapertorlugu § 3, imm. 2 tunngavigalugu.

Imm. 3. Takornariartutut paasineqassaaq Inatsisartut inatsisaat manna naapertorlugu inuk, angalasoq inuup taassuma nalinginnaasumik najortagaata najugaqarfigisaataluunniit avataani, angalaneq tamarmiusoq taassumaluunniit ilaa aliikkutassarsiorluni, qasuersaarluni imaluunniit sulingiffeqarnermit tunngaveqartillugu, tamatumunngalu atatillugu kiffartuunneqartartoq.

Kapitali 2*Takornariartitsinermit ingerlatsisinnaanermut akuersissut*

§ 3. Naalackersuisut aalajangiivigisassavaat akuersissuteqarnikkut piginnaatitsisarneq inummut imaluunniit inatsisit naapertorlugit inummut takornariartitsinermit ingerlatsinarluni qinnuteqartumut tunniussaartoqarsinnaanera.

Imm. 2. Takornariartitsinermit ingerlatsisinnaanermut atatillugu piumasaqaataavoq inuk pineqartoq imaluunniit inatsisit naapertorlugit inuk qinnuteqaateqarsimassasoq Naalackersuisuniillu

akuersissummik licens-imik allagartalerneqarsimassasoq, tak. imm. 1. Licensi aallaavittut tunniunneqartarpoq piffissami killilikkami.

Imm. 3. Licensimik tunisisoqarsinnaananeranut tunngaviusutut aallaaviuvoq qinnuteqartup piunasaqaatinik Inatsisartut inatsisaanni matumani §§ 8-11 -imiittunik naammassinninnera, akuersissummik licensimik tunineqarsinnaassaguni. Qinnuteqartup piffissami akuersissuteqarfiusumi tamarmiusumi piunasaqaatit naammassisimassavai.

Imm. 4. Licensi allamut tunniunneqarsinnaavoq siumoortumik Naalakkersuisut allaganngorlugu akuersereernerisigut.

Imm. 5. Naalakkersuisut tamanut takusassiarisinnaavaat ingerlatsisut kikkut licensimik atuuttumik peqarnerat, kiisalu licensip piffissaq atuuffigisaa tamanut ammasuni quppersakkani.

Imm. 7. Inuit imaluunniit inatsisit naapertorlugit inuit inunnik angallassisartut sumiiffimmiit sumiiffimmut, kiisalu Kalaallit Nunaanni namminermi, angallassinerminni takornariartitsinermik ingerlatsisannigitsut matumani pineqanngillat licensimik peqartussaanermi.

Imm. 8. Kaffisortitsinerit, qilaatersortarnerit, uaajaarneq aamma allat taamatut eqquumiitsulionertut ingerlatat licenseqarnissamik piunasaqaateqarfiunngillat.

§ 4. Naalakkersuisut pisuni immikkut ittuni Inatsisartut inatsisaanni §§ 8-11 -imi piunasaqaataasunik sanioqqutsisoqarsinnaatitsisinnaapput Inatsisartut inatsisaammik tunngavilimmik aalajangersakkat naapertorlugit.

§ 5. Takornariartitsinermik ingerlatsisarnissamut licensimik qinnuteqartut paasissutissanik piunasarineqartunik tamanik suliassap pisortanit Inatsisartut inatsisaannik tunngavilimmik suliassat sularineqarnissaanut atatillugu akuersissummillu licensimik tunngaveqartunik ilisimatitsissuteqassapput.

Imm. 2. Naalakkersuisut kisitsisinik paasissutissanik katersinissamik siunertaqartunik, tak. imm. 1, naapertorlugu pisortani oqartussanut allanut Namminersorlutillu Oqartussat ingerlatseqatigiiffiutaannik paasissutissanik avitseqateqarsinnaapput.

Imm. 3. Naalakkersuisut akuersissutinik - licensinik suliaqartarnerup allanut suliassanngortinneqarsinnaananeramik siunnerfeqartumik aqqissuussineq pillugu paasissutissanik allanut tunniussaqaqtarsinnaapput, tak. imm. 1, pisortani oqartussanut imaluunniit Namminersorlutik Oqartussat ingerlatseqatigiiffiutaannut, Naalakkersuisut pisussaaffinik oqartussaaffiinillu § 7, imm. 1 naapertorlugu suliassanut akisussaaffilerneqarsimasunut.

§ 6. Naalakkersuisut ersarinnerusunik malittarisassiorsinnaapput Kalaallit Nunaanni takornariartitsisarnermut piunasaqaatinut ileqqussanullu licensimik tunniussisarnernut atatillugu, matumani aamma takornariartitsinermik ingerlatsisut nalunaarusiortarnermut pisussaaffiint paasissutissanillu allanik nalunaaruteqartarnermut tunngasutigut.

§ 7. Naalakkersuisut licensinik tunniussaqaqarnermut pisussaaffimminik inatsisartut inatsisaat una naapertorlugu § 3 tunngavigalugu, nakkutilliineq § 13, kiisalu peqqussuteqartarnerit pillugit § 14,

imm. 1-2, kiisalu licensimik utertitsisarnerni aamma utertitsinerup nalunaarutigineqartarnerani § 14, imm. 3-4 naapertorlugit, Inatsisartut inatsisaat una tunngavigalugu pisortani oqartussanut allanut, imaluunniit Namminersorlutik Oqartussat ingerlatseqatigiiffiutaannut peqqussuteqarsinnaapput.

Imm. 2. Pisortanit Oqartussat imaluunniit Namminersorlutik Oqartussat ingerlatseqatigiiffiutaat pisussaaffinnik pisinnaatitaanernillu tigusaqartut imm. 1 naapertorlugu, pisussaaffinnut pisinnaatitaanernullu taakkununga atatillugu pisussaaffeqartinneqassapput suliassanik suliaqartarnerit pillugu pisortani ingerlatsinermi malittarisassat naapertorlugit, kiisalu pisortani ingerlatsinermi ileqqusut nalinginnaasut naapertorlugit.

Imm. 3. Naalakkersuisut ersarinnerusunik malittarisassiorsinnaapput nakkutilliinermut kiisalu naammagittaalliorsinnaanermut, pisussaaffinnik pisinnaatitaaffinnillu oqartussanut allanut imaluunniit Namminersorlutik Oqartussalluunniit ingerlatseqatigiiffiutaannut tunniussisoqarsimatillugu.

Kapitali 3

Pisinnaatitsissummik pigisaqartut

§ 8. Takornariartitsinermit ingerlatsisinaanermut licensimik taamaallaat tunniussisoqarsinnaavoq inunnut piumasaqaatinik imaattunik naammassinnittunut:

- 1) Inuk pineqartoq Kalaallit Nunaanni inuit allattorsimaffianni nalunaarsugaasimappat.
- 2) Inuk pineqartoq tamakkiisumik Kalaallit Nunaanni akileraartarpat.
- 3) Inuk pineqartoq pigisaminik nalilinnut tamakkiisumik atuisinnaappat, akiliisinnaajunnaarsimangippat imaluunniit akilersuiunnaarsimangippat.

§ 9. Takornariartitsisarnermut licensimik taamaallaat nalunaaruteqartoqarsinnaavoq ingerlatseqatigiiffimmut, piumasaqaatinik tulluuttunik naammassinnittumut:

- 1) Ingerlatseqatigiiffik aningaasaliissuteqarnikkut ingerlatseqatigiiffiuppat imaluunniit suliffeqarfiuppat inuit nammineq pigisaat, Kalaallit Nunaannilu angerlarsimaffeqarluni.
- 2) Ingerlatseqatigiiffimmi aningaasaliissutit affaanit annertunerusut toqqaannartumik toqqaannangitsumilluunniit inunnit ataasiakkaanit pigineqarpata, Kalaallit Nunaanni inuit allattorsimaffianni nalunaarsorsimasunit, taakkualu Kalaallit Nunaanni akileraartartuuppata. Inuit pineqartut ataasiakkaat akiliisinnaajunnaarsimassanngillat, akilersuijunnaarsimanatik imaluunniit sulianik unitsitsisimasutut suliarineqassanatik.
- 3). Peqataasut affaanit amerlanerusut inuit namminneq ingerlatseqatigiiffiutaanni Kalaallit Nunaanni inuit allattorsimaffianni nalunaarsorsimassapput, tamakkiisumillu Kalaallit Nunaanni akileraartartuullutik. Peqataasut akiliisinnaajunnaalissanngillat, akiliisinnaassuseqaratilluunniit imaluunniit akilersuijunnaarsimassanatik. Inuit namminneq ingerlatseqatigiiffiutaanni peqataasut inuit imaluunniit pigisat nalillit inunnit pigineqassapput Kalaallit Nunaanni inuit allattorsimaffianni nalunaarsorsimasunit, tamakkiisumillu Kalaallit Nunaanni akileraartartuussallutik. Inuit

ataasiakkaarlutik peqataasut akiliisinnaajunnaalissanngillat, akiliisinnaassuseqaratilluunniit imaluunniit akilersuijunnaarsimassanatik.

4) Ingerlatseqatigiiffik aningaasaliissuteqartoq pigisaminnut nalilinnut tamakkiisumik oqartussaassuseqassapput. Ingerlatseqatigiiffik akiliisinnaajunnaalissanngilaq, akiliisinnaassuseqaraniluunniit imaluunniit akilersuijunnaarsimassanani.

5) Ingerlatseqatigiiffiit aningaasaliissuteqartut piginnittut toqqaannartumik imaluunniit toqaannanngitsumik ingerlatseqatigiiffimmi taasisinnaatitaanerit affaanit amerlanerusunik pigisaqartut Kalaallit Nunaanni inuit allattorsimaffianni allattorsimasuussapput, Kalaallit Nunaannilu tamakkiisumik akileraartarlutik.

Kapitali 4

Sillimaniarnermut pilersaarusat

§ 10. Takornariartitsisarnermut licensimik akuersissummik tunineqarsinnaanermut aallaavittut tunngaviuvoq takornariartitsisarnermut qinnuteqartup immersorsimassagaa allaganngorlugu sillimaniarnermut pilersaarusiaq ingerlatassanut neqeroorutiginiarneqartunut assigiinngiiaartunut tunngasoq, takornarianut saaffiginnittoq. Aallaaviusussat tunngaviusussatut atuupput apeqqutaatinnagu pineqartup kiffartuussinissat toqqaannartunik takornariartunut neqeroorutigisarniarnerai imaluunniit allat pingajuusut aqqutigalugit neqeroorutigisarniarnerai.

Imm. 2. Sillimaniarnermut pilersaarut sukkulluunniit takuneqarsinnaassaaq allaganngukkatut kalaallisut aamma tuluttut.

Imm. 3. Sillimaniarnermut pilersaarut katitsigaassaaq nalorninaatinik nalilersuinernik aamma sillimanissamut pilersaarusianik. Kikkulluunniit Kalaallit Nunaanni ingerlatsinissanik neqerooruteqartut akisussaapput sillimaniarnermut pilersaarutit akuttunngitsunik malinnaatinneqartarnissaannut pisariaqaleraangallu aamma ingerlaannaq.

Imm. 4. Nalorninaatinik nalilersuinerit peqataasartunut siunnerfilersugaassapput, imaqassallutillu ingerlatani aalajangersimasuni nalorninaatinik naliliisarnernik, nalorninaatinillu nalilersuinerit peqataasunut namminernut saaffiginnittuussapput ersarissunillu paasissutissartaqartarlutik pissutsinut immikkut pingaaruteqartunut tunngasunik. Ingerlatsinernik piareersaasiorluni aaqqissuussinerni nalorninaataasinnaasunik nalilersuineq sulisorisassanik toqqaasarnermi tunngavigineqartassaaq, matumani aamma angalanerup ingerlanneqalernerani siulersuisussanik, avatangiisini pissutsit nalilersorumallugit, atortussanik toqqaasarnert il.il. aamma nalilersorumallugit.

Imm. 5. Sillimaniarnermut pilersaarut ingerlatassanik tunngaveqartuussaaq, makkuninngalu imaqassalluni:

- 1) allaaserinninneq iliuusaajumaartunik pissutsit ulorianarsilluinnassagalarpata imaluunniit ajutoortoqaralarpat,
- 2) paasissutissat ilisimariigassanut, misilittakkanut aamma piginnaanernut tunngasunik sulisuusuni ingerlatsinerni peqataasuni, aamma

3) qanoq qinnuteqartumi sulisuusut qisuariartassanersut ulorianartoqalernerani, matumanissaaq attaveqaqatigiinnikkut.

Imm. 6. Imm. 1-5 atuutinngilaq pissutsini allatigut inatsisinik atuuttunik tunngaveqarfiusuni imaluunniit periaatsini sillimaniarnermi piumasaqaatinik aqutsiviusuni, ingerlatsinermut attuumassuteqartunik, qinnuteqartup malissallugit pisussaaffigisaani.

Imm. 7. Licensimik qinnuteqartoq sillimaniarnermut pilersaarummik suliaqarsimanissamik piumasaqaatinik atuisussaangitsinneqarsinnaavoq, tak. imm. 1-5, siumoortumik /ilutigisaanik sanioqutsinissamik qinnuteqarsimanikkut, Naalakkersuisut nalilerpassuk sillimaniarnikkut nalorninaateqanngitsoq ingerlatsinissamut atasunik qinnuteqartumit ingerlanniarneqartuni.

Kapitali 5

Sillimasiinerit matussusiisussat aamma allatigut sillimasiissutit

§ 11. Takornariartitsisarnermik ingerlatsisuusup suliffeqarfiutaa Inatsisartut inatsisaannik matuminnga tunngaveqartoq akisussaaffiit pillugit sillimasiissuteqarsimassaaq imaluunniit allatigut qularnaveeqqusiisimassalluni.

Imm. 2. Imm. 1 atuutinngilaq pisuni inuussutissarsiummut atatillugu sillimasiissummik peqarfiunngitsuni, takornariartitsinermik ingerlatsiviusumut matussusiisussamik, imaluunniit allatigut sillimasiisinnaanerup periarfissaaffiginngisaani.

Imm. 3. Naalakkersuisut ersarinnerusunik malittarisassiorsinnaapput sillimasiissutaasut matussutissaannut piumasaqaatinik aammalu imm. 1 naapertorlugu qularnaveeqqusiisarnernut atatillugu.

Kapitali 6

Akitsuutit

§ 12. Naalakkersuisut takornariartitsinermik ingerlatsivinnut suliffeqarfinnut aamma takornariartitsinermik ingerlatsisunut inuussutissarsiutinullu ingerlatsisunut licensimik qinnuteqartunut akiliuteqartitsinnaapput aningaasartuutitut suliamik ingerlatsinermut atasunik, pisortat allatigut sullissinerannut, matumanissaaq suliamut atatillugu paasisutissinneqarnissamik qinnuteqartunut pisortani sulianik ingerlatsineq pillugu inatsit naapertorlugu, aamma Inatsisartut inatsisaannik tunngaveqartumik malittarisassat atuuttut naapertorlugit.

Imm. 2. Akiliut akitsuutitut akiligassiissutigineqarsinnaavoq.

Imm. 3. Naalakkersuisut ersarinnerusunik malittarisassiorsinnaapput akitsuusiisarnermut, imm. 1 naapertorlugu.

Kapitali 7

Nakkutilliineq, peqqussut aamma takornariartitsinermik ingerlatsinermut licensip utertinneqarnera

§ 13. Naalakkersuisut nakkutilliisuupput takornariartitsinermik ingerlatsisut Inatsisartut inatsisaannik malinninnerat pillugu, malittarisassat Inatsisartut inatsisaannik tunngavilimmik.

§ 14. Naalakkersuisut takornariartitsinermik ingerlatsisunut peqqussuteqarsinnaapput Inatsisartut inatsisaannik, malittarisassanik Inatsisartut inatsisaannik tunngavilinnik akuersissutinillu atuuttunik malinninnissamik.

Imm. 2. Naalakkersuisut peqqussuteqarsinnaapput takornariartitsisartunut paasissutissanik tunniussaqaarnissaannik Inatsisartut inatsisaat aamma malittarisassat Inatsisartut inatsisaannik tunngavillit naapertorlugit.

Imm. 3. Naalakkersuisut Inatsisartut inatsisaat manna naapertorlugu licensimik akuersissutaasumik utertitsinnaapput, takornariartitsinermik ingerlatsisup Inatsisartut inatsisaat naapertorlugu peqqussutaasut naammassinngippagit.

Imm. 4. Naalakkersuisut utertitsineq nalunaarutigisinnaavaat, tak. imm. 3, tamanut ammasumik.

Kapitali 8

Zone-nut agguaneq il.il. inuussutissarsiutinik ingerlatsinernut aamma sumiiffiit ilaannut killeqartumik isersinnaatitaaneq

§ 15. Naalakkersuisut malittarisassiorsinnaapput ersarinnerusunik sumiiffiit ilaannut killeqartumik angalaarsinnaaneq pillugu, aamma inuussutissarsiutinik ingerlatsineq taamaallaat ingerlanneqartarsinnaasoq sumiiffinni aalajangersimasuni piffissami immikkut aalajangersagaasuni imaluunniit maleruagassat immikkut aalajangersagaasut naapertorlugit.

Imm. 2. Malittarisassat imm. 1 naapertorlugu aalajangersakkat, akerliussanngillat kommunimi pilersaarusionut, nuna tamakkerlugulu pilersaarusionut imaluunniit inatsisinut allanut, malittarisassiortunut killeqartumik sumiiffimmiissinnaanernut, imaluunniit inuussutissarsiutinik ingerlatsisinnaanernut sumiiffinni ersarinnerusunik aalajangersarneqarsimasuni, piffissani ersarinnerusunut atuuttunik imaluunniit atugassarititaasunik immikkut ittunik eqqortitsiviusussanut.

Kapitali 9

Kinguneqartitsisarnerit

§ 16. Akiliisitsissuteqarnermik pineqaatissiisoqarsinnaavoq pineqartumut piaaraluni imaluunniit mianersuvaalliorujussuarluni:

1) takornariartitsinermik ingerlatsisumut § 3, imm. 2 naapertorlugu licenseqarani.

2) Licensimut atugassarititaasunik Inatsisartut inatsisaat naapertorlugu aalajangersarneqartunik unioqutitsisumut, imaluunniit malittarisassanik Inatsisartut inatsisaat naapertorlugu aalajangersagaasunik unioqutitsisumut.

3) Eqqunngitsunik imaluunniit paatsoortitsiniutaasunik paasissutissiisumut imaluunniit paasissutissanik nipangiussisumut pisortanit piumasarineqartunik, § 5, imm. 1 naapertorlugit.

4) Peqqussutaasunik § 15, imm. 3, imaluunniit § 16, imm. 1 naapertorlugu tunniunneqartunik malinninngitsumut.

Imm. 2. Inatsisartut inatsisaata imaluunniit malittarisassat Inatsisartut inatsisaannik tunngaveqartut akiliisitsisoqarnissaanik aalajangersaasimappata, akiliisitsissutissaq inatsisit naapertorlugu inummut tutsinneqarsinnaapput Kalaallit Nunaanni pinerluttulerinernut inatsimmik tunngaveqartumik.

Imm. 3. Peqqussutini atortuutinneqartuni tunngavigalugit § 6, § 11, imm. 2 aamma § 15 -imi aalajangersaasoqarsinnaavoq pineqaatissiisutissanik Kalaallit Nunaanni pinerluttulerinermik inatsimmi malittarisassat naapertorlugit.

Imm. 4. Inatsisartut inatsisaannik imaluunniit malittarisassanik Inatsisartut inatsisaannik tunngaveqartunik unioqutitsinikkut arsaarinnittoqarsinnaavoq nunatta karsianut tutsinneqartussanik Kalaallit Nunaanni Pinerluttulerinermut inatsimmi malittarisassat naapertorlugit. Arsaarinnissutaasut nunatta karsianut iluaqutissanngortinneqassapput.

Imm. 5. Akiliisitsissutit pineqaatissiisutigineqartut Inatsisartut inatsisaannik, imaluunniit malittarisassanik Inatsisartut inatsisaannik tunngaveqartunik nunatta karsianut akilerneqassapput.

Kapitali 10

Eqqartuussivinni misililineq

§ 17. Inatsisartut inatsisaannik tunngaveqartunik aalajangiineq eqqartuussivinnut suliassanngortinneqarsinnaavoq piffissaliussap qaammatinik 6-inik sivisussusillip iluani, aalajangiineq illuatungiusumut pineqartumut nalunaarutigineqareeraangat.

Imm. 2. Suliat Inatsisartut inatsisaannut uunga tunngasut Kalaallit Nunaanni eqqartuussivimmut suliassanngortitsivittut siullertut suliaritinneqartassapput.

Imm. 3. Aalajangiinermik eqqartuussivinnut suliassanngortitsineq aalajangernermik ingerlaannaq atortuulersitsinngilaq, Naalakkersuisut allatut aalajanginngippata.

Kapitali 11

Atortuulersitsineq aamma piffissamut ikaarsaariarfiusumut aalajangersakkat

§ 18. Inatsisartut inatsisaat atortuulerpoq ulloq 1. januar 2025.

Imm. 2. Inatsisartut inatsisaat atortuutinneqassanngilaq 1. januar 2027 angullugu takornariartitsinernik ingerlatsinernut inatsisinik unioqqutitsinerunngitsunik Inatsisartut inatsisaata atortuulernerani ingerlanneqartunut.

Namminersorlutik Oqartussat, ulloq xx. xxx 2024

Naalakkersuisut Siulittaasuat